





白氏長慶集


辛火之

白氏文集卷第五十五

翰林制誥二

凡四十三道

杜佑致仕制



勅盡悴事君明哲保身進退始終不失其道自非賢  
達孰能兼之司徒同平章事杜佑以長才名略為國  
元臣歷事四朝殆逾三紀出專征鎮為諸侯帥入贊  
台袞為王室輔嘉猷茂績中外洽聞寵任既崇勤勞  
亦至頃以年登致仕退請懸車方深倚注久未得謝  
勉就牽率迨茲累年今抗疏披誠至于數四敦諭頗  
切陳乞彌堅期於必遂理不可奪守冲知止佑實有  
焉賢哉大夫今古同道宜從優異之命式表褒崇之  
禮尚資耆望俾傳東朝可太子太師致仕如天氣晴

和亦任朝謁昔祁奚申叔皆就請老國有大事入議  
否臧忠臣愛君豈必在位永觀前事期副茲懷

鄭涵等太常博士制

某官鄭涵等並早以文行久從吏職輩流之間頗爲  
淹滯况雅有學識進修不已禮官方缺宜當此選凡  
朝廷禮制或損益有宜中外謚議或褒貶不決爾爲  
博士皆得正之所任非輕各敬乃事並可太常博士

除韓臯東都留守制

國之都府半在東州未遑時巡方委留鎮非位望崇  
盛加之勤舊者則不足以允僉屬而副重寄也刑部  
尚書韓臯名德之後鬱然公才正行通規貫于終始  
累遷臺府連鎮藩維入修職業出樹風聲故多遺愛

著聞中外况一登朝序殆三十年舊德耆望無居其  
右俾又東夏僉以爲然乃加冢卿以示崇寵敬服嘉  
命永孚于休可檢校吏部尚書東都留守

中書舍人韋貫之授禮部侍郎制

典郊祀之禮獻賢能之書今小宗伯實兼二事非直  
清明正者不足以處之中書舍人韋貫之沈實賢峻  
文以禮樂行成於內移用於官公直之聲滿於臺閣  
頃以詞藻選登禁掖秉筆書命時稱得人久積勤勞  
宜有遷轉可使典禮以和神人可使考文以第俊秀  
儀曹之選僉議所歸往修乃官無替厥問可禮部侍  
郎餘如故

薛存誠除御史中丞制

庶官之政得人則舉况中執憲準繩之司所以提振紀綱端肅内外蓋一職修者其斯任之謂歟給事中薛存誠選自郎署列于左曹居必靜專言皆謹正章疏駁議多所忠益可以執憲立于朝端况副相方缺臺網是領糾正百官爾得專之夫直而不絞威而不猛不附上以急下不犯弱以違強率是而行號為稱職敬服斯命往其懋哉可御史中丞餘如故

前長安縣令許季同除刑部郎中前萬年縣令杜羔除戶部郎中制

前長安縣令許季同前萬年縣令杜羔等頃自郎署分宰京邑而長吏待之小乖常禮雖同辭託故動未得中然遠耻以退道不失正各從免職亦既踰時况

文行政能皆推於衆詢諸時議宜有遷授尚書郎缺方選才良憲部人曹俾膺並命季同可刑部郎中羔可戶部郎中

京兆少尹辛祕可汝州刺史制

京兆少尹辛祕頃守吳興時逢擾亂安人殄寇節効可稱出倅戎車入貳京輦亦有政績著于官常今以汝邠軍郡之大方求良吏委之分憂詢事考能爾當其選往即乃土以舒吾人可汝州刺史

除李遜京兆尹制

近歲京兆長吏數遷誠不便時抑有其故或鈐鍵不謹吏緣為姦或鈎距大煩人受其弊既非中道皆不得已而罷之宜求恬智寬猛相濟者親諭斯旨使父

於其職以息吾人浙江東道觀察使御史中丞李遜  
十年以來連守四郡或紛擾之際或荒饉之餘威惠  
所加罔不和輯賞其殊績擢在大藩自臨會稽一如  
舊政况省科禁以便俗通津梁以息征動遵詔條深  
副朝旨江南列鎮良帥則多集課程功爾爲稱首而  
內史之選久難其人今予所求唯爾可使雖表率州  
部其委非輕然尹正京師所資尤急宜輟材於浩壤  
佇觀政於輦轂望爾有成無替厥命可權知京兆尹

除孔戣等官制

渾金璞玉方圭圓珠雖性異質殊皆國寶也是故能  
官人者亦辯而用之諫議大夫孔戣靜專貞白不涉  
聲利執言守事無所依違駕部郎中薛存誠廉潔直

方飾以詞藻中立不倚介然風規吏部員外郎王涯  
端明精實加之以敏懿文茂學尤推於時並歷踐朝  
行恪勤官次諫垣郎著藹其休聲宜加公獎擢在近  
侍左右禁闥可以同升必能評奏臺議發揚綸誥臨  
事有立屬詞可觀各隨所長分命以職祇奉乃事無  
替厥猷戣存誠並可給事中涯可兵部員外郎知制  
誥

除李建吏部員外郎制

六官之屬選部郎首之歷代以來諸曹郎之中擇其  
踐歷久考第高加以有器局律度者遷焉今之選任  
亦由是矣兵部員外郎李建文行才理公勤課績可  
謂具美宜居厥官歲調方殷勉勤爾事可吏部員外

郎

除劉伯弼虢州刺史制

給事中劉伯弼以文雅才名給事左闕實掌駁議再逾歲時亦謂恪勤宜從遷轉而虢略近郡黎人未康藉爾良能爲予撫字懸賞佇効勉哉是行可授虢州刺史

除周懷義豐州刺史天德軍使制

西受降城尤居邊要西戎北虜介乎其間委之郡符建以戎號將守之遷宜乎得人前汝州刺史周懷義久列禁衛嘗從征伐又領軍郡率著勤功宜加獎用可屬憂寄況茲要鎮實扼戎吭掎角諸軍肩鑷右地牧人訓旅兼領非輕無替前勞在申後効可豐州刺

史天德軍使

除某官王某魏博節度使制

師長之選重難其人况河上列城鄴中雄鎮初喪良帥思安衆心若親與仁方膺是命某官王某出忠入孝根乎至性好學樂善出於餘力發自修己施于爲政可以守土可以長人今兩河之間三軍乏帥是用命爾領茲大藩澄清魏風輯理相土爲我垣翰永孚于休徃其欽哉無替厥職可魏博等州節度觀察使除某節度留後起復制

懋勲德者慶鍾于嗣襲忠順者教本於親於是乎有代及之恩有賞延之命所以光子道而激臣節也茲惟舊典可舉而行某官某惟乃祖父勤勞王家咸有

忠功書于甲令降及於爾亦克負荷早承義訓久倅  
戎麾自罹憫凶能著成敬恭俟朝命靖安人心雖在  
幼冲足可嘉獎今屬元戎初喪衆望顛然宜選親賢  
以爲統帥留府之事俾爾專之加戎秩以奪哀遷冬  
卿以示寵奉揚新命無忘前修爾宜懋哉懸賞佇効  
可節度留後檢校工部尚書

除薛平鄭滑節度制

武牢以東至于白馬形勢之地水陸之會宜擇文武  
兼備者以爲守臣右衛將軍薛平自司禁旅爲我爪  
牙訓整警巡能宣其力嘗使于絕國可謂有勞嘗牧  
于大郡亦聞有政况忠厚爲質通明爲用秉吏道之  
刀尺襲將門之弓裘可以爲三軍之帥可以理千乘

之賦俾輟才於北落往節制於東方爾宜式遏四封  
輯寧百衆明簡稽以實軍旅信賞罰以勸吏人勉率  
乃職無忝厥命仍以冬卿副相兼而寵之可檢校工  
部尚書兼御史大夫

除盧士玫劉從周等官制

君有舉左史得書之政有闕諫官得補之二職者歷  
朝之清選也前侍御盧士玫嘗在西川時爲從事亂  
危潜伏能潔其身前監察御史劉從周頃佐宣城奉  
公守政端士之操終然不渝時所稱論並宜甄獎况  
學術詞藻見推於衆並命清貫僉以爲宜記事盡規  
各佇能効士玫可起居郎從周可右補闕

張正一致仕制



前諫議大夫張正一學行器用為時所稱擢居諫官  
翼効忠謹雖年齒未暮而衰疾有加所宜願養不可  
牽率俾移優秩以從致政可國子司業致仕

張正甫蘇州刺史制

浙右列城吳郡為大地廣人庶舊稱難理多選他郡  
二千石之良者轉而遷焉鄧州刺史張正甫自領南  
陽僅經三載廉平清簡以臨其人安政和理行第  
一宜以大郡推而廣之用旌前勞且佇來効可蘇州  
刺史

崔清晉州刺史制

左司郎中崔清以才良行敏補尚書郎頗積公勤宜  
加獎任頃嘗為郡亦聞有政平陽舊壤特謂名藩得

才與能方可共理安人俗佇有成績可晉州刺史

除柳公綽御史中丞制

中憲之設糾謬懲違一引其綱百職具舉非清與直  
不稱厥官諫議大夫柳公綽忠實有常文以詞學介  
然端直有古之遺風頃居臺憲累次郎位持平守正  
人頗稱之擢首諫司器望益重今副相缺位中司專  
席惟有守者可以執憲惟無私者可以閑邪詢事審  
官爾當是選光昭新命振起舊章宜一乃心以揚其  
職可御史中丞

除田興工部尚書魏博節度使制

馭下安人其道不一或序能以次用或因效以拔才  
所命雖殊同歸共理某職某官田興時屬本軍初喪

戎帥亂政咸啓羣心不寧而興列在偏裨奮其義勇  
謀成必中事至能斷智略所及指麾所加一軍獲安  
百衆附悅連獻章䟽恭俟制命有節有禮朕用嘉之  
夫以將材如彼軍情若此允膺不次之舉可貴非常  
之功是用龍之冬卿擢爲大將仍以印綬就拜軍中  
其敬之哉無墮乃力可檢校工部尚書兼御史大夫  
魏博等州節度觀察等使

除鄭餘慶太子少傅制

東朝三少歷代重選不必備位在乎得人吏部尚書  
鄭餘慶貞明儉素有古人風發自修身施於爲政出  
入中外多歷要重咸有勤績存于官次况動中禮法  
學綜儒玄是謂羽儀之臣可居師傅之任輔我元子

爾其勉歟可太子少傅

除裴堪江西觀察使制

江西七郡列邑數十土沃人庶今之輿區財賦孔殷  
國用所繫茲爲重寄宜付長才同州刺史裴堪素蓄  
器幹久經任遇日者資其忠諒入爲諫議大夫藉其  
良能出爲左馮翊曾未周歲政立績成區區一郡未  
盡其用鍾陵要鎮可以委之夫簡其條章平其賦役  
徇公率正以臨其人而人不安未之有也祇服厥命  
往修乃官仍兼中憲以示優寵可江西觀察使兼御  
史中丞

贈杜佑太尉制

生有爵祿歿有褒贈此王者所以崇哀榮之禮厚君

臣之恩况有輔臣所宜加等某官致仕佑以通濟之才公忠之節逢時入用為國大臣外領藩鎮內參台鉉積勤盡悴迨過三紀左右于位亦既八年天不憖遺奪我元老憫然興歎實軫于懷永言褒榮俾峻禮命上公之秩用賁幽靈嗚呼錄舊旌勞知予不忘可贈太尉

除孔戢萬年縣令制

京邑令缺多擇尚書郎有才理者補之兵部員外郎孔戢自御史府遷夏官之屬凡所蒞職一心奉公在郎署間稱有名實加以文學綵飾吏能俾宰京劇佇有成効

除裴向同州刺史制

馮翊之地密邇郊畿分內史之政參京師之化俾善所職其在得人京兆少尹裴向器蘊利用學通政事久試吏治頗著良能累守大郡入亞天府奉上撫下皆有可稱左輔之重爾膺其選况征賦猶重人庶未康實望良才與之共治勉副所舉往修厥官可同州刺史

除武元衡門下侍郎平章事制

朕嗣守丕業迨將十年實賴一二輔臣與之共治故外鎮方域則仗以為將有絳侯厚重之質有邴吉寬大之風自登台司克厭人望頃屬巴蜀軍後人殘權委節旄俾往鎮撫信及夷貊恩加疲瘵每因利以施惠不易俗而修教政無苟得人用便安惠茲一方時

乃之績報政既久屬望益深宜歸左輔以叅大政夫坦然公道可以叙衆才曠然虛懷可以應羣務弼違救失不以尤悔爲慮進善懲惡不以親讎自嫌用此輔君足爲名相欽率是道往復乃官可門下侍郎同中書門下平章事

### 除李夷簡西川節度使制

征鎮之大實惟蜀川西距于戎南漸于海有重江複山之險有長轂堅甲之旅水陸交會華夷雜居疇能治之我有良帥山南東道節度使其官李夷簡以正事上以簡臨下仗茲器用累當任遇執憲之難也爾爲臺丞其職甚舉司計之重也爾調邦賦其効可稱爰資長才出領重鎮自摠符鉞于漢之南專奉詔條

削去敝政均穀籍不一之賦罷舟車無名之征近悅遠來歸如流水俗用丕變人迄小康三載考功爾爲稱首進其右秩遷于大藩以均惠乎四方以旌勸乎羣吏昔文翁明於教化種暘優於政能巴蜀之間遺美猶在不替前効可以副之佇聞有成用光厥命可檢校吏部尚書劍南西川節度等使

### 除袁滋襄陽節度使制

漢以二千石之良者入爲公卿周以六官之賢者出兼侯伯內外之任所命則殊至於治軍國寵忠賢其致一也戶部尚書袁滋奉上甚勤臨下甚簡安人附衆尤是所長須資其能移鎮東郡略其科禁緩其征徭政不滋彰人用休息在部七載績成課高璽書徵

還益聞遺愛老幼遮道事鄰古人朕方勤郵疲民褒  
獎循吏累月再命其有旨哉舉鄭滑之政也故旌武  
公之美寵以司徒憂襄漢之人也故仗叔子之才委  
茲征鎮類能而使其在此乎勉揚厥聲無替前効可  
某官山南東道節度等使

歸登右常侍制

近侍之列騎省為貴歷代迄今選任頗重必詢望實  
而後命之工部侍郎歸登朴忠沈厚心無詭詐介圭  
不飾止水無波澹然自居以致名稱抱此素行歷踐  
清貫掌議左掖貳職冬官歲時滋深體望益茂可以  
備顧問應對之選列言語侍從之臣冠附貂蟬立之  
于右訪諸時論僉以為然可右散騎常侍

李程行軍司馬制

隋州刺史李程頃自周行出分憂寄漢南大郡守之  
五年頗著良能宜當選獎况專習文學通知兵事西  
南重鎮初委元戎慎選副車爾當此舉三軍之重俾  
往貳之仍加憲職以示優寵可御史中丞劔南西川  
行軍司馬

李旼虞部郎中制

金州刺史李旼雅有文藝飾以政事早從吏職久領  
郡符謹慎廉平頗副所任虞曹郎缺命以序遷敬茲  
寵名勉守厥位可尚書虞部郎中

牛僧孺監察御史制

河南縣尉牛僧孺志行修飾詞學優長頃對策于庭

其言甚直累從吏職頗謂滯淹訪諸時論宜當朝選  
俾升憲府以觀其才可監察御史

裴克諒量留制

華州刺史奏華陰令裴克諒在官清白奉法考秩向  
滿其政如初借留三年用觀成績朕方旌求良吏俾  
養黎元適副所懷宜可其奏

張聿都水使者制

前湖州長史張聿頃以藝文擢升朝列嘗求祿養出  
署外官名不為身志亦可尚喪期既畢班序當遷俾  
領水衡以從優秩可都水使者

薛伾鄜坊觀察使制

鄜時延安抵于中部羗夷種落散在其間戎夏雜居

易擾難理宜選寬明之使通知邊者委以符節而  
糾綏之右金吾將軍薛伾服勤戎職練達吏道出入  
中外綿歷歲年能一乃心以宣其力自加寵遇再執  
金吾徼巡有嚴夙夜匪懈在公若是何用不臧况為  
人沉靜內肅外和按俗守封是其所善宜輟務於誰  
何俾宣風於廉察庶乎勞俸諸部綱紀列城奉詔條  
以安人叅戎索以訓旅欽承厥命徃復乃官仍踐冬  
卿式光重寄可檢校工部尚書充鄜坊等州觀察使

韓愈比部郎中史館修撰制

太學博士韓愈學術精博文力雄健立詞措意有班  
馬之風求之一時甚不易得加以性方道直介然有  
守不交勢利自致名望可使執簡列為史官記事書

法必無所苟仍遷郎位用示褒升可依前件

李暈安州刺史制

宿州刺史李暈勲闕之門嗣生才略久叅戎衛頗著勤勞試守列城觀其為政屬汴泗之右創畫州居府署城池委之經始一日必葺三年有成且聞公勤宜有遷轉重分憂寄再佇良能往安吾人無忝厥命可安州刺史

竇易直給事中制

前御史中丞竇易直器質識智厚重間敏文合法要學通政經累踐臺郎擢司邦憲寬猛舉措甚得其中官不易方府無留事前因病免今以才遷俾升瑣闥以備顧問夫制令奏議官獄典章苟有依違皆得駁

正所任不細宜敬乃官可給事中

孟簡賜紫金魚袋制

漢制二千石有政績者就加寵命不即改移蓋欲使吏久於官人安其化也常州刺史孟簡簡易勤儉以養其人政不至嚴心未嘗怠曾未再稔績立風行歲課郡政毗陵為最方求理實獲我心宜加命服以示旌寵庶俾群吏聞而勸焉宜賜紫金魚袋

盧元輔杭州刺史制

河南縣令盧元輔早以學藝列在周行嘗守商都頗聞有政再領京縣益見其才江南列郡餘杭為大征賦猶重疲人未康藉爾登車往分憂矚勞俸安緝稱朕意焉懸賞旌能以佇報政可杭州刺史

錢徽司封郎中知制誥制

中臺草奏內庭掌文西掖書命皆難其人也非慎行敏識茂學懿文四者兼之則不在此選祠部郎中翰林學士錢徽諳然儒風粲然詞藻績密若玉端直如弦自參禁司益播其美貞方敬慎久而彌彰應對必見於據經奏議多聞於削藁迄今六載其道如初嘉其忠勤宜有遷擢俾轉郎吏仍參綸閣茲乃榮獎爾其敬承可依前件

獨孤郁司勳郎中知制誥制

考功負外郎知制誥獨孤郁學識文行時論所推選自外郎擢居右閣綸言樞命既重且推委以發揮甚聞稱職而端諒忠謹介然自居爲臣若斯足可嘉獎

當滿歲職亦逾年宜從美遷以光近侍可司勳郎中知制誥

白氏文集卷第五十五



白氏文集卷第五十六

翰林制詔三勅書批答祭文贊  
與王承宗詔

勅王承宗朕臨馭天下及此五年三叛誅夷四方清  
泰不以功武自負常推恩信為先爾父云亡即欲命  
卿受詔而遠近方鎮内外人情紛然奏陳皆云不可  
朕以卿累代積勲賢之業一門有忠義之風功著艱  
危恩連姻戚雖中心是念而眾請難違可否之間久  
不能決然亦欲觀卿進退之禮察卿忠孝之心卿自  
罹憫凶屬經時月待使臣而動皆得禮奉章疏而言  
必由衷請獻官負願輸貢賦而又上陳密款遠達深  
誠潔身而謀出三軍損已而讓推二郡斯有以得臣

子之大節知君親之大恩卿心旣然朕意亦定特加  
新命仍撫舊封今授卿起復左金吾衛大將軍檢校  
工部尚書克成德軍節度使恒州刺史恒冀深趙等  
州觀察等使兼御史大夫仍賜上柱國并賜告身旌  
節等往想卿忠孝哀感兼深其德棣兩州以卿進讓  
尤欲於卿親屬之內選授一人在法雖有推恩相時  
亦恐非便今所以除薛昌朝德棣兩州觀察使昌朝  
昔嘗事卿先父今又與卿親鄰卿宜具以誠懷令報  
昌朝知委卿今授命之後足得節制三軍使其不失  
事宜方見卿之忠蓋昨者衆情易惑非卿不能効此  
誠群議難排非朕不能斷此意所宜保持大義勉勵  
遠圖深念斯言永副予望其當軍大將已下各宜特  
與改轉卿即條錄聞奏其官健等亦宜量加優賞想  
宜知悉

荅李遜等謝恩令附入屬籍表

卿先父頃逢多難嘗立大功每想忠勞豈忘存歿念  
先臣之績雖書名於太常推同姓之恩更附籍於宗  
正俾增榮於一族兼延寵於九原卿等或詩禮承家  
或弓裘奉業咸鍾新命慶屬本枝省所謝陳深嘉誠  
懇

祭盧虔文

維元和四年歲次己丑七月丁巳皇帝遣某官某以清  
酌庶羞之奠致祭于故祕書監贈兵部尚書盧虔之  
靈惟爾質性端和風猷茂遠名因文著位以才升秉

大節而事君始終一致陳義方而訓子忠孝兩全甲族推華士林增美久在貂蟬之列近遷圖籍之司方延寵光遽闕幽宥褒獎之命雖已表於哀榮遣奠之恩宜再申於軫悼魂兮不昧鑒此誠懷尚饗

批李夷簡賀御撰君臣事跡屏風表

朕思求理化親閱典墳至於去邪納諫之規勤政慎兵之誠取而作鑒書以爲屏與其散在圖書心存而景慕不若列之繪素目覩而躬行庶將爲後事之師不獨觀古人之象卿詞彰恭順義見忠規省覽再三深叶朕意所賀知

批百寮嚴綬等賀御撰屏風表

朕烈祖太宗以古爲鏡用輔明聖實臻理平垂作孫謀每懼乎失墜取爲殷鑒遂飾丹青至若明君直臣前言往事森然在目如見其人論列是非旣庶幾爲座隅之誠發揮獻納亦足以開臣下之心况卿等職在儀形政當補察各勤所任共副茲懷所賀知

荅杜兼謝授河南尹表

卿文通吏道學達政源凡歷官常輒聞績効觀能以授俾亞理於三川見可而遷宜專臨其一府盡委封畿之政仍兼運漕之權歲時之間佇有勤効勉恭爾職重副予懷所謝知

與茂昭詔

勅茂昭盧校等至省所奏恒州事宜并別論請陳獻者具悉卿望重勲賢寄崇藩鎮謀參廟筭寵接國姻

累上表章繼陳誠款永言智略已見匡濟之才載念公忠益表感知之志若非勞瘁憂國義勇忘家則丹赤之心不能至此想風興歎至于再三所緣恒州事宜朕亦思之甚熟但以武俊率身仗順於國有功忠勲所延宜及俊嗣承宗又密陳深款遠獻忠誠既念舊勞已降成命計其奉詔必合感恩如或乖違續有商議卿宜以睦隣爲事體國爲心想卿誠懷當悉朕意

與師道詔

勅師道省表具悉卿業重相門位崇戎閫忠輸于國行著于家久而益彰嘉歎無已所奏亡兄師古節烈于私廟昭穆者此乃心推孝友誠切恭敬覽表尤深足嘉尚但以祠廟所見貴於禮成師古雖則始營至卿方行禘禮即卿爲廟主固合其宜况師古爵位尊崇弘選自合祔廟別立祠宇使其主之奉以蒸嘗亦非乏祀也已令有司重議如此頗謂得中且叶禮經卿宜知悉

與於陵詔

勅於陵省所賀安南破環王國賊帥李樂山等三萬人者具悉卿蠻夷犯疆方鎮致討兇徒喪敗荒徼清平卿素蘊忠誠又連封壤疾旣同於山藪勢益壯於輔車想聞捷書當倍慰愜載省所賀深見乃懷

答段祐等賀冊皇太子禮畢表

朕祇膺統序恭守典常爰推至公乃命長子使主國

嘗用貞邦家冊畢禮成良增感慶卿等各司軍衛同  
奉表章備見忠誠益深嘉歎所賀知

答李詞賀處分王士則等德音表

朕臨馭天下以懲勸爲先有惡必誅無功不念顧承  
宗之罪誠合討除思武俊之勲宜令嗣襲况墳墓禁  
其剪伐將校許以歸降庶明用師蓋非獲已卿職修  
卿寺誠奉本枝省茲賀章備見忠藎

與吐蕃宰相鉢闡布勅書

勅吐蕃宰相沙門鉢闡布論與勃藏至省表及進奉  
具悉卿器識通明藻行精潔以爲真實合性忠信立  
誠故能輔贊大蕃叶和上國弘清淨之教思安邊陲  
廣慈悲之心息兵甲旣表卿之遠略亦得國之良

光朕與彼蕃代爲甥舅兩推誠信共保始終覽卿  
奏章遠叶朕意披閱嘉歎至于再三所議割還安樂  
秦原等三州事宜已具前書非不周細及省來表似  
未指明將期事無後艱必在言有先定今信使往來  
無壅疆場彼此不侵雖未申以會盟亦足稱爲和好  
必欲復修信誓即須重畫封疆雖兩國盟約之言積  
年未定但三州交割之後尅日可期朕之衷情卿之  
志願俱在於此豈不勉歟又緣自議三州以來此亦  
未發專使今者贊普來意欲以再審此言故遣信臣  
往諭誠意即不假別使更到東軍此使以後應緣盟  
約之事如其間節目未盡更要商量卿但與鳳翔節  
度使計會此已處分令其奏聞則道路非遙往來甚

易頗爲便近亦冀速成更待要約之言皆已指定封疆之事保無改移即蕃漢俱遣重臣然後各將成命事關久遠理貴分明想卿通才當稱朕意曩者鄭叔矩路必因平涼盟會沒落蕃中比知叔矩已亡路必見在念茲存沒每用惻然今旣約以通和路必合令歸國叔矩體骨亦合送還表明信誠兼亦在此其論與勃藏等尋到鳳翔舊例未進表函節度不敢聞奏自取停滯非此稽留昨者方進表函旋令召對令使發遣更不遲迴仍令與祠部郎中兼御史中丞徐復及中使劉文璨等同往其餘事宜已具與贊普書內卿宜審於謀議速副誠懷兼有少信物賜卿具如別錄至宜領也冬寒卿比平安好遣書指不多及

與希朝詔

勅希朝省所奏請自部領當道兵馬一萬五千人取蔚州路赴行營并奏土門及承天軍各添兵士備禦者具悉卿武毅雄才忠貞大節出爲良將倚作信臣約已徇公忘身許國忿違命不恭之寇激勤王自効之心親統銳師率先群帥况又周知要害備設防虞計其威聲已振克醜有臣如此朕復何憂佇建殊功以副深重所有動靜宜數奏聞想當知悉

與師道詔

勅師道朱何至省所奏當道赴行營兵馬取正月過渡河逐便攻討并奏兵馬出界後請自供一月糧料又奏待收下城邑若有軍糧一月已後續更支計并

陳謝慰問者具悉卿文武間生忠貞特立動有所効  
知無不爲昨獻帛助軍極盈數於萬疋今又賫糧出  
境減經費於三旬此乃力之所任無不罄竭慮之所  
及無不經營因時見憂國之心臨事識忠臣之節詔  
書慰諭未盡朕懷章疏謝陳益嘉乃至再三與歎寤  
寐難忘其所奏聞並依來表想宜知悉

與劉濟詔

勅劉濟李臯至省表及露布十二月十七日劉緄部  
領當道行營兵馬收下饒陽縣城破賊衆三千人并  
擒斬將校收獲馬畜器械等兼送賊將朝履清等四  
人又進所收饒陽縣等者具悉卿盡忠伐叛發漁陽  
清統之師緄仗順臨戎討異方昏狂之寇詔下而父

子戮力鼓行而將卒齊心先群帥以啓行首諸軍而  
告捷連擒逆將併下賊城歸獻罪之俘囚進已收之  
縣邑可謂忘身徇國盡禮事君疾風知偃草之心大  
雪見貞松之節况表章之內益歎恭勤而眷想之間  
如覩風采計茲兇醜當已震驚破竹之勢可乘覆巢  
之期非遠佇清大憝重副深懷其饒陽縣卿宜且令  
鎮守稍加存撫用勸將來宋常春卿所密奏具委事  
情且宜叶和以體朕意故令宣慰想當知悉

祭吳少誠文

維元和五年歲次庚寅二月辛未朔二日壬申皇帝  
遣內侍省內府局丞賜緋魚袋孫士政以清酌庶羞  
之奠致祭于故彰義軍節度使贈司徒吳少誠之靈

曰惟爾武毅挺質韜鈴拔身負勇果之雄材蓄變通之明識自察廉列郡節制成師貞且有爲勤而不擾軍戎輯睦封域底寧從義而致誠伏順而保福旣延寵渥方茂輝榮遽此幽淪深用傷悼逝波不捨去日苦多想松楸以軫懷聞鼓鼙而興歎恩加遣奠禮舉褒崇念爾有靈知予此意尚饗

與季安詔

勅季安省所奏當道行營兵馬今月十七日已收棗強縣其賊棄城夜走者具悉卿輸忠報國嫉惡忘家遣無敵之師伐不襲之寇軍聲遠屆先路以風行逆黨潛知棄城而宵遁已收縣邑益振兵威此皆卿訓練所加指麾有素永言明効實屬深懷固可乘勢應

機逐便進討以卿忠蓋當副朕心

與希朝詔

勅希朝張勳至省初奏前月二十六日破逆賊河湟鎮六千餘人具悉卿親領統師誓誅逆黨張軍心以吞敵奮士力而指蹤潛戒偏裨先攻險阻伐謀而事有成筭剋日而動不愆期果敗兇徒遂據要地况殺傷旣重收穫頗多益壯軍威可奪虜氣佇聞掃蕩以慰衷懷

與從史詔

勅從史曹公父至省所奏今月三日柘鄉縣南破賊衆約三萬人并擒斬首級收獲器械及馬等又奏當軍所傷士馬數并彙事優卹事宜具悉卿外揚武略



內竭忠謀率有名之師深入其阻遇無狀之寇大挫其鋒兵刃屢加捷書頻至殺傷數廣績効居多非卿悉力摧兇誓心報國則何能指麾之下動必成功表奏之間事皆審實既光重委益副深懷嘉歎再三不忘寤寐所奏承璫出軍合陣并續發露布事宜具委所陳想當知悉

與季安詔

勅季安許峯至省所奏具悉卿勲親重德台輔元臣竭誠信以戴君弘識度而體國謀能極慮言必盡忠周覽表章益增寤歎吳少陽自叅軍務頗効恭勤豈待奏陳已有處分想宜知悉

與昭義軍將士詔

勅昭義軍節度下將士等卿等當軍將士與諸道不同自經艱難多易將帥而忠順之節未嘗有虧朕每思之無時暫忘盧從史爲卿主將作朕藩臣權位尊崇恩寵優厚而乃外示恭順內懷姦邪刻削軍中暴殄境內朕以君臣之道未忍發明爲之含容頗有年月近又苟求起復請討恒州與賊通謀爲國生患自領士馬久屯行營收當軍賞設之資加本道芻粟之估不爲公用盡入私家此則主將之恩於卿何有臣子之分負朕實深卿等辨邪正之兩端識逆順之大義抱忠勇者耻居其下守名節者憤發於中失三軍之心已間大去犯衆人之怒果見不容遠察事宜備知誠款興言嘉歎至于再三其當軍將士等賞設已

有處分上自將校下及士卒各勵爾志再思朕言卿等承前以來常保忠貞之節自今以後永爲心腹之軍宜念始終副茲矚望故令宣慰宜並悉之夏熟卿等各得平安

與承璀詔

勅承璀卿總領禁軍控臨戎境見敵每彰其勇敢因事益表其忠勤言念在懷發於寤歎昭義軍將士等去邪遠惡仗義保忠統其成師宜得良帥孟元陽夙懷武毅累著功庸威名甚彰人望所屬以之爲帥必愜軍情以之討賊必有勲績今授元陽檢校尚書右僕射充昭義軍節度等使未到行營間其昭義軍宜切加宣撫務使安寧烏重胤職在偏裨保於忠正宜從獎擢以表殊恩今授烏重胤河陽節度使兼御史大夫卿亦宜諭此恩意令知朕心兼恐河陽無人速宜進發想當知悉

與元陽詔

勅元陽澤潞全軍方討恒翼盧從史虧失大節包藏二心姦迹邪謀日已自露軍情物議俱所不容尋追赴朝今已在道朕以昭義將士忠順成風况在行營久勤戎事今欲使其戰者奮發居者悅安共成大功必在良帥以卿有澗水之勲効有河陽之政令思之甚熟無以易卿宜領重藩仍遷宗秩今授卿檢校尚書右僕射充澤潞節度等使并賜旌節告身等往卿宜速發先到潞府上訖便赴行營慰安軍心宜諭朕

意烏重胤徇忠守節宜加獎用今便授重胤河陽節度使兼御史大夫想宜知悉

與昭義軍將士詔

勅昭義軍節度下將士等卿等久在行營乍無主將而士旅輯睦軍壘安寧足彰守正之心尤見盡忠之節以此歎矚勞於寢興孟元陽是朕信臣爲國良將威略可以攝兇孽慈和可以牧師人累著忠勤克諧朕命爲其主帥必副羣情况卿等同嫉姦邪久困貪暴宜以仁賢之帥撫卿忠義之軍靖思元陽無出其右今授元陽檢校尚書右僕射克卿等當道節度使勉同王事以慰朕懷烏重胤特効忠誠深宜獎擢今便授河陽節度使兼御史大夫故令宣慰並宜知采

與師道詔

勅師道林英至省所陳奏并進王承宗與卿書者具悉王承宗童騃無知兇囂有素雖籍祖父之寵曾微分寸之勞但以武俊勲在冊書姻連戚屬朕獨排羣議特降殊私未卒父喪使承祖業即加新命仍撫舊封則朕於承宗恩亦至矣而僞陳誠欺詐使臣假託軍情拒違詔命則承宗於朕罪莫大焉悖禮亂心暴於天下此乃承宗干國家之紀非朕忘武俊之功遂至用師蓋非獲已仍開生路許以自新而梟音不悛鴟張益熾人情共棄國典不容在於朕心安敢輕捨卿旣膺注意誠感酬恩所獻表章具已詳覽慮深遠計詞切謹言在忠謀而則然於事體而未可誠嘉

勤至難允懇懷今諸道將師親領士馬深入寇境頻  
奏捷書四面合圍一心旅進窮迫已甚覆滅非遙况  
御同遣師徒已收縣邑異清氛孽佇見功名勉於令  
圖副此矚望

### 與師道詔

勅師道仕文質至省表具悉盧從史頃者請率全師  
誓清妖孽推誠待物許之不疑而背恩於上結怨於  
下邪謀貳志日以彰聞虧大節而自絕於君積怨怒  
而不容於衆因以邀命幸而脫身屈法申恩已有處  
分昨者詔旨已明示卿卿體國爲心事若盡力固宜  
有聞必薦有見必陳竭其忠諫之誠濟其獻替之美  
省闕章奏嘉數良多

### 與茂昭書

勅茂昭王日興至省所奏今月十八日大破賊衆一  
萬七千人并擒斬收獲訖者具悉卿親率勁兵言平  
妖寇竭股肱之力中有奇謀勵父子之軍前無強敵  
故能深入賊境大破兇徒殺傷旣多俘獲亦廣具詳  
奏報備見忠勞眷屬之懷發於寤歎將士等各懷勇  
烈同忿寇讎激於衆心致此殊効况荷戈於炎暑之  
際奮身於鋒刃之間永念於茲未嘗暫忘故令宣慰  
宜並悉之

### 與昭義節度親事將士等書

勅昭義軍節度下親事將士等盧從史受恩至重負  
國至多衆所不容追令赴闕朕以誤曾任使貴全始

終今則止於貶官此蓋曲從寬典卿等抱忠懷義朕所素知頃以詣營同事從史三軍一體俱是王臣既不相干又能自効朕方優賞以酬功勳何至不安有此疑懼必恐從史已追之後元陽未到之間卿等當營乍無主將或被外人扇誘令衆意憂疑勢使之然事非獲已朕雖在此遠有軍情料卿本心必無此意况元陽勤儉恤下寬厚愛人久在河陽甚近澤潞元陽臧否卿等合諳以卿忠義之軍故擇仁賢為帥已有詔示宣諭元陽若到行營一無所問乃至將士家口亦令優卹安存卿復何憂必得其所况昭義將士艱難以來保守忠貞未賞虧失天下稱歎卿亦自知又卿父母妻兒家田墳墓一物以土並在潞州頃刻之間豈忍便棄朕之此語卿宜細思各相勉諭同保忠順計元陽已合到彼卿等便取元陽指麾想卿等心必副朕意故令宣慰宜並悉知

與執恭詔

勅執恭王克謹至省所奏今月八日進收平昌縣已令鎮守并奏劉濟欲與卿約義事者具悉卿奉辭伐罪仗節啓行指顧徧裨收復城邑已令鎮備兼務緝綏威惠之方既明弔伐之義斯在永言倚任彌注重期劉濟將相大臣與卿先父同列欲求契約固合允從豈唯繼好私情亦足叶心王事載省來奏深鑒乃誠至於寢興不忘嘉矚

與恒州節度下將士書

勅成德軍節度下將士等朕以王者之道與物無私若違命執迷則罔有容捨若知非改悔則無不含弘不窮無告之人不塞自新之路頃屬姦臣從史謀構異端致使恒陽隔於恩外六郡之地皆廢農桑三軍之人並懼鋒鏑每一念至中心憫然今卿等繼獻表章遠輸誠款省承宗之勤懇難阻其情思武後之功勞不能無念况事因註誤而理可哀矜今已降制書各從洗雪承宗仍復舊官爵充恒冀深趙德棣六州觀察使成德軍節度使將士等官爵實封並宜仍舊待之如初卿等各宜叶力同心知恩感德共保終始稱朕意焉故令宣慰宜並知悉

與承宗詔

勅承宗頃者盧從史包藏姦詐矯示公忠下誣物情上惑朝聽使卿陷於違命使朕至於用兵交亂君臣罪有所在今從史已正刑典遠棄驩州已構亂者既就屏除誘陷者自宜明白况卿代連姻戚朕豈不思祖有功勞朕豈不念事不得已勢至如斯棄絕以來常懷憫惻卿今既陳章疏懇獻衷誠請進官員願修貢賦誓心以納款歸罪而責躬情可哀憐法存開釋朕託十人上及茲六載體天地含弘之德厚君臣民始之恩常以人安為心豈欲物失其所今所以開獨見之路降非常之恩卿及將士等已具制書並從洗滌卿仍復舊官爵便克恒冀深趙德棣等州節度觀察等使并賜旌節告身等往爵土仍舊君臣如初想

卿中懷當自知感所宜追補前悔勉勤後圖夙夜思之永副朕意想當知悉

批宰相賀赦王承宗表

先臣武俊功不可忘後嗣承宗過而能改朕所以捨其罪悔議以勲親垂宥過之恩尚宜及爾十代引泣辜之責誠合在予一人與其黷武而取威不若匿瑕而務德卿等重居台輔密贊謀猷發於衷誠有此稱賀省閱章奏嘉歎久之

與劉濟詔

勅劉濟省所謝男紹及孫景震等授官并謝賜器仗弓甲刀斧等者具悉卿文武全才將相重任本於忠諒成此勲勞尚德尊賢位已極於台輔念功懋賞龍且及於子孫時論允歸朝章斯舉至於出茲戎器賜我元臣但可以申朕恩私未足以表卿功績載覽來表備見乃誠併此謝陳益嘉勤蓋

代王佖答吐蕃北道節度論贊勅藏書

奉勅撰

大唐朔方靈鹽豐等州節度使檢校戶部尚書寧塞郡王王佖致書大蕃河西北道節度使論公麾下遠辱來書兼蒙厚貺慰悚之至難述所懷國家與彼蕃代爲舅甥日洽恩信雖云兩國實若一家遂令疆場之臣得以書信相問况麾下以公忠之節雄勇之才翊佐大邦經略北道似近蒙制命守在邊陲慰望之情一二難盡皇帝以贊普頻遣和使懇求通好凡此邊鎮皆奉朝章但令慎守封陲不許輒令侵軼至於

事理彼此宜然且如党項久居漢界曾無征稅旣感恩德未嘗動搖然雖懷此撫循亦聞闕彼財貨亡命而去獲利而歸但恐彼蕃不知大爲党項所賣其中亦聞誘致事甚分明不能縷陳計已深悉今請去而勿誘來而勿容不失兩境之歡不傷二國之好在此誠爲小事於彼即是遠謀幸履坦途勿遵邪徑今聖上德柔四海威及萬方雖外國蠻夷尚皆率伏况中華臣妾敢有不恭豈假彼蕃欲相借助誠愧厚意終訝過言承去年出師討逐迴紇其間勝負此亦備知不勞來書遠相示及所蒙寄贈並已檢到似爲邊須守常規馬及胡瓶依命已授其迴紇生口緣比無此例未奉進止不敢便留今却分付來人至彼望垂檢

與吉甫詔

領有少谷信具如別數幸恕寡薄也初秋尚熱惟所履珍和謹因澤語官馬屈林恭迴不具似白

勅吉甫韓用政至省所奏陳謝具悉卿忠貞立身文武爲德志惟經國謀不忘君才可以雄鎮方隅故委之外閫智可以密叅帷幄故任以中樞而能一其衷心再有冲讓雖勞謙彌切每陳丹府之誠而憂寄方深難輟紫垣之務勉諭已伸於前詔忠勤載露於來章今征討已停方隅稍泰克清之日雖則不遥難奪之心亦宜且抑重此宜慰當體朕懷是推至公煩有陳謝

與吐蕃宰相尚綺心兒等書



勅吐蕃宰相尚綺心兒等論思諾悉至省表并進奉  
具悉卿等才器特茂識略甚明仗義立身資忠事主  
上佐贊普下康黎元以尋盟納款爲謀繼好息人爲  
請是卿上策吐朕中心每覽表章輒用嘉歎朕與彼  
蕃國代爲舅甥日結恩信自論盟會頗歷歲時常欲  
速成以爲永好雖誠明之內彼此無疑而言約之間  
往復未盡今故略收來意重示所懷極卿通明當所  
鑒悉河隴之地國家舊封論州郡則其數頗多計年  
歲則沿來甚近旣通和好悉合歸還今者捨而不言  
豈是無心愛惜但務早成盟約所以唯言三州則沒  
於彼者甚多歸於此者至少猶合推於禮讓豈假形  
於言詞來表云此三州非創侵襲不可割屬大唐不

且此本不屬蕃豈非侵襲所得今是却歸舊管何引  
割屬爲詞去年論與勃藏來即云覆取進旨贊普便  
請爲定今兩般使至又云比之小務未合首而論之  
前後旣有異同信使徒煩來去雖欲速爲盟會其如  
無所適從靜言二三固不在此若論和好即今各無  
侵軼已同一家若議修盟即須重定封疆先還三郡  
若三郡未復兩界未分即是未定封疆憑何以爲要  
約彼若吝惜小事輕易遠圖未能修盟且務通好至  
於信使一往一來但令踈數得中足表情意不絕彼  
有要事即令使來此有要事亦令使往若封境之上  
小小事意但令邊頭節度兩處計會商量則勞費之  
間彼此省便前般蕃使論悉吉贊至緣盟約事大須

審商量未及發遣後使雖是兩般所論只緣一事故  
令相待今遣同歸在於日時亦未淹久所送鄭叔矩  
及路泌神枢及男女等並已到此良用惻然厚贈遠  
歸深嘉來意其劉成師元非劉闢子姪本是成都郡  
人已令送還本貫其餘事目並在贄普書中卿等宜  
審叅量以副朕意使迴之日可備奏聞今遣兼御史  
中丞李鈺及中使與迴使同往各有少信物具如別  
數至宜領之秋涼卿等各得平安好遣書指不多及

荅王承宗謝洗雪及復官爵表

帝者之道蕩然無私唯推赤心以牧黔首故一夫不  
獲若納之於隍一物歸誠則容之如地况卿家聯懿  
戚寵自先朝祖立茂功賞延後嗣因人註誤不染疵

瑕滌以恩波煦之寵澤撫舊封而廉察六郡進新律  
而統制三軍蕩穢加恩何以過此及覩來表乃見深  
誠言必由衷事皆知感承家襲慶誓繼力於前修補  
過酬恩願指期於後効永言爾志甚叶朕懷勉思始  
終用副眷矚所謝知

與鄭綱詔

勅鄭綱省所奏邕管黃少卿及子弟等事宜具悉卿  
望重中朝寄深南服誓敷惠政佇化遠人言念忠勤  
不忘監寤山洞夷落易擾難安比來撫之未及其道  
覽卿所奏頗合其宜歲時之間當革前弊勉於招諭  
以副朕心

荅高郢請致仕第二表

卿有忠貞之節立於險中有清重之名鎮于朝右而能始終有道進退有常援禮引年遺榮致政人鮮知止卿獨能行不唯振起古風亦足激揚時俗於卿則確然難奪在朕則情豈易忘誠鑒乃懷未允來表

聖旨中與劉總詔

勅劉總卿業繼將門才兼武略累臨軍郡悉著良能襲以弓表宜加旌鉞仍舉奪情之典以昭延賞之恩今授卿起復雲麾將軍檢校工部尚書充范陽節度等使并賜旌節官告往想宜知悉

詔言心咨裴垵讓中書侍郎平章事表

卿自登台輔每竭忠貞一身秉彜百度惟序致君盡力久積股肱之勤憂國勞心微生媵理之疾暫從休告遽獻表章所陳雖是卿心所請殊非朕意宜加調攝速就平和以副虛懷無為固讓

荅劉總謝檢校工部尚書范陽節度使表

卿幼承義訓長有令聞能遵忠孝之風不墜弓表之業朕所以命加異等寵冠常倫特授雙旌超登八座豈唯延賞亦在任能將懋前修勉申後効載省章疏深鑒誠懷所謝知

與茂昭詔

勅茂昭王日興至省表陳讓檢校太尉者具悉卿文武大僚勳戚重望累展朝宗之禮足表恭敬之心况多戰伐立功彌彰勤蓋言念及此每用嘉焉宜加寵榮已降新命何至謙讓仍辭舊官眷倚之懷並具前

詔想宜知悉

答任迪簡讓易定節度使表

卿修文立身經武致用每誓心於忠勇常濟事以智謀自副戎車已屬時望及分旌鉞果愜軍情况武義之師輸忠仗順所期慰撫以就輯寧何至搗謙有茲陳讓所進官告今却賜卿宜體朕懷即斷來表

答裴垵讓宰相第三表

卿疾病已來表疏相繼雖辭乞之誠頗切而注望之意方深所以來章久而未報然念卿勤懇之請至于再三若心不甚安即疾難速愈是用輟樞劇之務加崇重之官稍遂優閒佇期痊復勉從爾志深抑予懷

答裴垵謝銀青光祿大夫兵部尚書表

卿自居鈞軸日獻謀猷戴君常竭其股肱憂國每形於顏色及嬰疾病益不遑安未踰四旬以至三讓撝謙秉易退之道堅懇陳難奪之詞遂抑朕心俯從卿請而七命印綬五兵尚書官秩甚崇事務稍簡就以優養冀乎和平載省表章深見誠意

與劉總詔

勅劉總康志安至省所謝陳具悉卿之必父為朕元臣大節殊功歿而不朽宜加恩禮俾洽哀榮故命宰臣為之撰錄卿義深報國孝重承家既感顯親之恩願竭戴君之節遠有奏謝益用嘉之想宜知悉

與房式詔

勅房式卿以良才尹茲東洛公忠無怠聲績有聞嘉

歎之深寧忘寤寐宣城重寄深在得人藉卿政能往就綏撫今授卿宣州刺史兼御史中丞充宣歙等州都團練觀察處置等使并賜告身往卿宜便起赴本道勉修所任以稱朕懷想當知悉

與盧恒卿詔

勅盧恒卿累登朝序皆著公方自領藩條益彰理行恪恭而奉上勤儉以牧人不加寵榮何勸來者朕以擢管漕運軍國所資其務甚殷所寄尤重以卿有忠勞之前効幹濟之長才常簡朕心宜授此職今除卿尚書刑部侍郎充諸道鹽鐵轉運使并賜告身往宜即赴闕庭想當知悉

與新羅王金重熙等書

勅新羅王金重熙金獻章及僧冲虚等至省表兼進獻及進功德并陳謝者具悉卿一方貴族累葉雄材仗忠孝以立身資信義而爲國代承爵命日慕華風師旅叶和邊疆寧泰况又時修職貢歲奉表章進獻精珍忠勤並至功德成就恭敬彌彰載覽謝陳益用嘉歎滄波萬里雖隔於海東丹慊一心每馳於闕下以茲嘉尚常屬寢興勉弘始終用副朕意今遣金獻章等歸國并有少信物見如別錄卿母及妃并副王宰相以下各有賜物至宜領之冬寒卿比平安好卿毋比得和宜官吏僧道將士百姓等各加存問遣書指不多及

答文武百寮嚴綬等賀御製新譯大乘本生

心地觀經序表

朕勤求道本廣挹教源以真如不二之宗助清淨得一之化况斯經典時為大乘名理精微翻譯成就雖契心則離於文字而得意亦假於筌蹄庶使發揮因為述序卿等精通外學懇竭忠誠引經贊揚奉表稱賀再三省覽嘉歎久之

荅孟簡蕭俛等賀御製新譯大乘本生心地

觀經序狀

大僊經典最上法乘來自西方閱于中禁將期利益必在闡揚遂命僧徒譯其句偈兼詔卿等潤以文言昨因披尋深得真諦悟本生不滅之義證心地無相之宗方勤護持聊著序引永言述作猶愧聖明卿等

賀陳良深嘉尚

荅元應授岳鄂觀察使謝上表

夏口重鎮屬在時賢非明肅不能理其軍非簡儉不能阜其俗以卿有仁厚之質蹇直之風累踐班行皆著名節遂輟中憲往臨外藩知已下車深慰人望佇茲報政用副朕懷所謝知

荅李鄘授淮南節度使謝上表

卿抱兼人之才秉徇公之節每登要職悉著能名若刃發硎投而不滯如玉在佩動必有聲朕以距淮而南人物繁會非廉明何以貞師察俗非簡惠何以通商綏農前勞旣彰後効何遠載省來表知已下車勉副虛懷佇觀新政所謝知

盡大羅天尊贊

歲正月十九日順宗仙駕上昇之日月也皇帝嗣位六載每及茲晨齋居孝思明發不寐以爲玄祖之教本乎道先帝之神在乎天故盡大羅天尊像者欲以最上勝因而成本功德也然則知之者不如念之者念之者不如仰之者是用諦念貞力度仰尊儀命設色之工圖其儀形命掌文之臣贊其功德達孝誠于天上致孝理於域中斯蓋弘願發於我皇景福薦於先后稽首奉詔跪稱贊云  
維大羅兮天上天維天尊兮仙上仙高真之鑒照下界孝敬之心達上玄每一念兮以一仰感罔極兮福無壘

白氏文集卷第五十六

白氏文集卷第五十七

翰林制誥四

勅書批荅祭文贊詞附凡六十八首

荅元義請上尊號表

朕自君臨運逢休泰時歲豐稔兇醜殄夷此皆宗社降靈忠賢宣力顧惟寡德敢受鴻名卿中發懇誠上尊美號雖屬人望難貪天功宜悉所懷勿固爲請

荅薛萃賀生擒李錡表

朕自嗣耿光每多惕厲念必先於除害忘無忘於安人李錡大負國恩自貽天罰師徒未動於疆場父子俱肆於市朝信上天之禍淫與率土而同慶省視來表深鑒乃誠所賀知

與薛萃詔

勅薛萃楊君靖至省所陳謝具悉卿勤王之節徇公  
滅私事主之誠移忠資孝苟非褒贈何以顯揚且清  
白之風旣自家而刑國則寵旌之澤宜因葉以流根  
式遵追遠之經用表教忠之訓是爲禮典煩致謝章

與嚴礪詔

勅嚴礪薛光朝至所陳謝具悉卿徇公竭誠臣節克  
著揚名濟美予道有光教忠旣本於義方追遠宜崇  
於禮命俾優褒贈爰慰孝思秩貴冬官以表過庭之  
訓封榮石窀用旌徙宅之賢雖示新恩允符舊典遠  
煩陳謝深見懇誠

與餘慶詔

勅餘慶省所謝陳具悉卿累居袞職時謂盡忠自尹  
洛師日聞報政臣節旣彰於宣力子道莫大於揚名  
俾光孝思爰舉禮命榮褒冢宰寵賁幽靈式是彝章  
豈爲私渥有煩陳謝深見誠懷

答黃裳請上尊號表

朕以薄德嗣守丕圖不敢荒寧以弘理道幸屬歲時  
豐稔兇寇梟夷風雨不愆禮圓丘而報本雷霆未震  
疊太社而服刑斯皆十聖降靈幽贊寡昧百辟叶德  
馴致和平永惟弘名實懼虛美卿上稽祖訓下酌羣  
情陳獻表章請加徽號暨于王公卿士降及耆艾緇  
黃咸一乃心各三其請朕嘗以宰元化者曲成於物  
法天道者從欲於人雖恤隱泣辜未臻三五之化而  
樂推欣戴難違億兆之心德非稱焉讓不獲已勉從



所請深愧于懷

與從史詔

勅從史楊幹至省所奏本月七日到潞城縣降雪尺餘兼奏耆老等詣闕請欲立碑并手疏通和劉濟本末事宜者具悉卿分朕之憂求人之瘼時降大雪豐年表祥豈惟澤及土田將使物無疵厲休慶斯在慰望良深耆老等遠詣闕庭請立碑記尋已允許當體誠懷以旌政能無至陳讓知卿協比其鄰翼戴為意陳此手疏發於血誠忠懇彌彰嘉嘆不已永言臣節何日忘之想宜知悉

與韓臯詔

勅韓臯省所陳賀具悉卿朕自守睿圖每思寡政慮先恭念在措刑李錡負國反常阻兵干紀未勞師旅已就誅夷卿宣力納忠秉心嫉惡遠陳慶賀深見懇誠想宜知悉

與元衡詔

勅元衡卿立身許國竭力匡君人之具瞻予所嘉賴凋殘是卹遠藉宣風之能利澤所資暫輟為霖之用慈和既敷於兵後惠信當洽於言前永念忠勤豈忘寤想計卿行邁已到西川涉遠冒寒固甚勞頓勉加綏撫以副朕懷想宜知悉

荅李扞等謝許上尊號表

朕自臨萬邦僅經三載位雖託於人上化未洽於域中永念眇身敢當大號卿等義深宗室忠盡君親一

其情誠三有陳獻迫以人望厭于天心遂抑所懷勉從其請固辭而事非獲已撫德而何以堪之再省謝章彌增惕厲

荅馮伉請上尊號表

朕統承大寶時屬小康伐謀而吳蜀克清示信而華夷有截斯昔宗社坐祐天地降和非予冲人所能馴致卿上稽十聖之訓下酌萬人之心以爲不讓強名未傷於體道屈已循物何爽於至公遂抑素懷俯從衆望雖鴻名未稱每勞踏地之心而人欲下從即爽法天之德勉依勤請良用愧懷

荅長安萬年兩縣百姓耆壽等謝許上尊號表

朕每念雍熙慙未及於億兆永言徽號讓已至于三而文武具寮緇黃庶老懇陳誠款明引訓謨開于以天地無私之心起予以聖宗不易之訓以大道者無求於物物尊而不辭至公者非欲其名名立而不讓迫於固然之禮不得已而許之卿等誠至感通義深欣戴再煩陳謝益用愧懷

荅元素謝上表

卿用兼文武識合變通輟綱領於中朝授麾幢於外闔吏能足以惠物將略足以董戎人望所歸予心是賴知卿已到本鎮當慰疲人深藉撫綏之方以安凋弊之俗日期報政歲望成功勉勤所圖用副朕意

荅韓臯請上尊號表

錫珍致和幸逢昌運加名建號豈稱眇身而文武具  
素黎獻庶老引古今之明訓陳億兆之懇誠謂德有  
月歸謳謌不可以苟讓謂功有所獻徽號不可以固  
辭遂抑中懷俯從衆望庶增修乎茂實與克副於鴻  
名卿發誠自中歸美于上勉依所請彌愧于心

荅馮伉謝許上尊號表

朕以眇身嗣于丕業心雖勞於惕厲化未及於雍熙  
永惟強名實懼虛美上自一二元老下及億兆黎人  
大洽詢謀明徵典訓增予以巍巍之號感予以顯顯  
之誠既迫所懷俯從其請卿義深奉上志切戴君再  
省謝陳彌增愧惕

與顏証詔

勅顏証詔戴岌至省所賀及謝王國清充五岳鎮監軍自  
悉卿職在撫綏任兼備禦公勤夙著聞望日彰言念  
于懷豈忘寤寐乾象昭感壽星坐文與時相膺有道  
則見顧慙菲德何以當之卿戎旅事殷宜有監領蓋  
為常例煩至謝陳想宜知悉

與從史詔

勅從史省所陳謝追贈亡母并舉薦韋悅具悉卿推  
誠奉國積慶成家既彰盡節之忠宜洽流根之澤雖  
祿難逮養已闕靈於九原而孝在顯親宜旌賢於三  
徒俾崇封贈以極哀榮韋悅既有才能又所諳委卿  
即發遣令赴闕庭卿之忠誠朕所識察豈待陳露然  
後知之載覽來章益嘉懇切想宜知悉

與季安詔

勅季安省所陳請具悉卿朕纂承鴻業司牧蒼生僅致小康未臻大化實慙薄德未稱崇名而華夷兆人內外羣后屢有勤請難於固違卿遂獻表章明徵典訓納忠於上歸美於君勉從懇誠良用愧悵儲貳者上繼宗祖下貞邦家心旨暫忘事或未暇尚阻來請當體所懷

與高固詔

勅高固卿奉國戴君必竭忠節統戎護塞克著勲勞自領藩垣委之心膂忠愨之志久而益彰欽歎在懷何嘗暫忘以卿一從軍旅多在邊陲歲月積深勤勞滋久所宜出入中外周寵光今授卿檢校尚書右

僕射御史大夫兼右羽林軍統軍以端揆之崇衛之帥遂卿望闕之戀表朕念功之心仍賜卿官牛卿宜即赴闕庭想宜知悉

祭故贈婕妤孟氏文

維元和二年歲次丁亥十二月甲寅朔十九日壬申皇帝遣某官某以庶羞之奠致祭于故婕妤之靈曰惟爾和順積中柔明奉上動靜合肅雖之體進退得婉孌之儀選自良家備茲內職修令顏以顧德蘭幽有香守明節而保身玉潔無玷方資懿範以茂嘉猷彼美有聞于何不淑遽茲淪逝深用惻傷既卜日晨爰申奠醑以爾有班氏之明智故贈以婕妤以爾有宓妃之姿容故葬於洛浦魂兮不昧歆此誠懷尚饗

洛浦原在  
長安界

季冬薦獻太清宮詞文

維元和二年歲次丁亥十二月甲寅朔二十六日巳  
卯嗣皇帝臣稽首大聖祖高上大道金闕玄天元皇  
大帝伏以今年司天臺奏正月三日記上帝于南郊  
佳氣充塞四方溫潤祥風微起廬州申連理樹一株  
彰義軍節度使進白鳥一鄭滑觀察使奏瑞麥五科  
司天臺奏六月五日夜鎮星見河陽節度使進白雀  
一荆南節度使申連理樹一本山南西道觀察使申  
嘉瓜一枚司天臺奏六月十三日夜老人星見河南  
府申芝草兩莖司天臺奏冬至日佳氣充塞瑞雪祁  
寒者臣嗣承丕圖肅恭寅畏祖宗垂慶佳瑞荐臻虔

奉禎祥伏深祗惕今時惟玄律節及季冬仰薦明誠  
敬率恒典謹遣攝太尉司徒平章事杜佑薦獻以聞  
謹詞

與茂昭詔

勅茂昭盧校至省所奏請上尊號及建儲闡賀誅李  
錡并進馬者具悉卿朕以寡德祗嗣丕圖雖致小康  
豈稱大號迫於人望遂抑予懷永惟強名實愧虛受  
儲貳者上繼宗祖下貞邦家心非躔忘事或未暇尚  
阻來請宜體所懷李錡包藏亂心奮發兇德不勞征  
討自就誅夷想卿忠誠倍以爲慰所進馬馴良可尚  
服御且閑取其戀主之心足表爲臣之節再三省覽  
嘉歎久之想宜知悉

答百寮謝許追遊集宴表

在昔哲王居于人上推其憂樂與衆共之頃屬三兇  
荐興二載連獲凡百有位咸一其心誠念嘉謀共致  
昭泰今四表無事三農有年恩與羣情同其具慶是  
宜削苛察之前弊煦寬裕之新恩仁及下而啓迪歡  
心澤先春而導迎和氣昨逢多故主憂且使臣勞今  
致小康土安則宜下樂庶欲解人之慍粗伸推已之  
恩豈曰殊私煩於陳謝

答李扞謝許遊宴表

朕自御萬方僅經三載運逢休泰俗漸和平當朝野  
無虞之時見君臣相遇之樂是故去滋彰之化弘優  
貸之恩近自宗親下及士庶賜其宴衍遂以優游蓋  
以已之所安思與人之共樂雖夕惕而若厲每戒志  
於無荒賜春遊以發生宜助時而有慶卿等榮崇宗  
寺恩重本枝省所謝陳彌嘉誠懇

答劉濟詔

勅劉濟省所奏茂昭送卿管內百姓殷進能等七人  
奏前後事由具悉卿爲國大臣與君同體寡而得衆  
忠以忘身每循公而滅私能虛懷以容物與茂昭疆  
場之事小有違言曲直是非朕已明辯卿外崇藩翰  
內贊謨猷念屈已以爲心或難容忍思戴君而是力  
宜務時和勉卿寬裕之懷助朕含弘之化想宜知悉

與柳晟詔

勅柳晟上英琦至省所奏慶雲并進圖者具悉昌運

將開祥符先見發自和氣聚為卿雲捧日而五色相  
宣垂天而萬物咸覩斯為嘉瑞宜契昇平朕方致小  
康未臻大化受茲玄貺祇惕良深卿以誠事君推美  
奉上獻輪困於圖畫陳懇款於表章披閱再三彌增  
嘉嘆

荅薛萃謝授浙東觀察使表

卿久踐吏途累聞能政及居藩鎮尤見忠勤訓導而  
羣黎向方廉察而列郡承式實嘉乃績每簡予心宜  
遷雄劇之藩以廣循良之化勉於為理副朕所懷所  
謝知

上元日嘆道文

道本無象功成強名生一氣之先為萬物之母吹煦  
寒暑陰陽節而歲功成輔相乾坤上下交而生物遂  
故能阜蕃動植啓迪雍熙邦家保安夷夏咸若今以  
時殷獻歲節及上元女道士某等奉為皇帝焚香行  
道敬修功德伏願聲聞紫極丕降玄休大庇羣生永  
康四海流光垂慶億萬斯年

畫大羅天尊讚文

道用無窮統之者大聖神化不測感之者至誠非圖  
像無以示儀形非供養無以展嚴敬故一念一禮而  
福隨之畫大羅天尊者奉為順宗至德大聖大安孝  
皇帝忌辰之所造也皇帝祖玄元之風嗣清淨之理  
志在善繼心惟孝思申命工人彰施繪事粹容儼若  
真相炳焉憑志誠而上通垂景福而下濟詞臣奉詔

恭為讚云

真通之象孝感之心率土瞻仰在天照臨蒼黃為精誠發為圖畫如從大羅應念而下

荅朱仕明賀冊尊號及恩赦表

朕以寡德嗣承睿圖俯從衆誠勉受鴻稱慶之大者豈在予一人推而廣之宜及爾萬姓爰因受冊之禮遂施作解之恩俾與羣生同斯大慶卿盡忠訓旅推美奉君省茲賀陳深見誠至

祭咸安公主文

維元和三年歲次戊子三月癸未某日皇帝遣某官某以庶羞之奠致祭于故咸安大長公主覩濬毗伽可敦之靈曰惟姑柔明立性溫惠保身靜修德容動

中規度組紉之訓既習於公宮湯沐之封遂開於國邑及禮從出降義重和親承渥澤於三朝播芳猷於九姓遠修好信既申協比之姻殊俗保和實賴肅雍之德方憑福履以茂輝榮宜降永年遽歸長夜悲深訃告寵極哀榮爰命使臣往申奠禮故鄉不返烏孫之曲空傳歸路雖遙青塚之魂可復遠陳薄酌庶鑒悲懷嗚呼尚饗

與仕明詔

卿久鎮邊防初膺闡寄式旌勤効俾洽恩榮褒德念功故進封以示寵忠誠亮節宜因實而錫名既表新恩亦惟舊典今改封卿丹陽郡王仍改名忠亮勉勤乃事以副所懷想宜知悉



與崇文詔

勅崇文段良玘至省所謝二妻邑號具悉卿有濟時之勲寵居冢職士政承積善之慶列在王官俾洽恩光故加褒贈念梧桐之早落不及夫榮追芼改之遺芳宜從子貴式崇寵命以賁幽靈省茲謝章良用嘉嘆

祭張敬則文

維元和三年歲次戊子七月辛巳朔二十七日丁未皇帝遣某官某以清酌之奠致祭于故鳳翔節度使贈某官張敬則之靈惟爾挺武毅之質負將帥之才名以忠聞位由勤致自膺閫職益茂勲猷惠葺疲氓威吞黠虜一方膏雨千里長城繼博望之功勞能恢

代業傳子房之籌略不墜家聲方誓山河遽捐館舍逝川無捨遠日有時徽績空存書旗常而播美音容不見聽鼙鼓而增思永念忠勤彌深軫悼往陳遣奠庶鑒悲懷嗚呼尚饗

與希朝詔

勅希朝劉忠謹至省所奏沙陀突厥共一千八百七十人并駝馬器械歸投事宜具悉卿以將帥之才鎮華夷之要憂勞爲國忠勇忘家聲動寇戎塵清封略突厥等嚮風輸款率屬來賓雖慕我懷柔遠無不至亦因卿威惠導之使來念其歸投宜有優賜今賜衣服及匹段等自首領已下卿宜等第給付其部落家口等遠經跋涉宜稍安存以勸歸心用副注意

與元衡詔

勅元衡省所奏當管南界外生蠻東凌六部落大鬼  
主苴春等以所管子弟百姓等二千餘戶請內屬黎  
州并奏南路蕃界消息者具悉卿以文武之才兼將  
相之任仁和下布黎庶獲安威惠旁流蠻夷率附勲  
勤斯著倚賴彌深欽矚之懷豈忘寤寐生蠻部落苴  
春等久阻聲教遂此歸投願屬黎州請通縣道勉於  
撫慰以勸將來所奏蕃界事宜具已知悉戎虜雖聞  
喪敗封疆不可無虞亦宜隄防用副憂矚

與陸庶詔

勅陸庶省所奏當管新開福建陸路四百餘里者具  
悉卿望重周行寄分越徼嘉聞素著茂政累彰况勤  
可使人智能創物廢驚波之路開砥石之途捨舊謀  
新以夷易險財力不費商旅斯通惠既及人動非擾  
下績用可尚欽嘆良深

荅盧虔謝賜男從史德政碑文并移貫屬京兆表

卿男從史爲國重臣自領大藩厥有成績公忠茂著  
政理殊尤勒石所以表勲賜文所以褒德惟功是念  
有善必旌是國舊章非予私渥昨又請移鄉貫願隸  
京邑家聲益振臣節逾章雖清望標門崇冠山東之  
族而丹心戀闕恥爲關外之人載省懇誠彌深嘉嘆  
所謝知

與宗儒詔

勅宗儒卿邦家楨幹班列羽儀嘗作股肱弼諧無怠  
及司管籥鎮靜有方欽重之懷寢興不捨春宮之長  
非賢不居旣簡朕心亦符人望今授卿禮部尚書并  
賜官誥往除餘慶東都留守卿宜便與交割即赴上  
都想宜知悉

與希朝詔

勅希朝省 奏党項歸投事具悉卿邊隅寄重閫外  
事繁威行而軍聲外揚信及而戎心內附動皆展効  
進必盡忠勞績彌彰倚望尤切党項拓跋忠敬等頃  
雖爲盜今已經恩懼而歸投情可容恕許其後効以  
補前非卿宜安存無使疑懼其磨梅部落等尚能繼  
至亦許自新宜加招諭令知朕意

與韓弘詔

勅韓弘任光輔至省所陳請具悉卿文武全畧邦家  
重臣自居大藩厥有成績輯寧百姓嚴整三軍使予  
無憂惟爾之力省茲章奏懇願朝宗誠嘉深衷難遂  
勤請朕以梁宋之地水陸要衝運路咽喉所王室藩屏  
人疲易散非卿之惠不能安師衆難和非卿之威不  
能戢今衆方悅附人又知歸鎮撫之間事難暫輟雖  
戀深雙闕積十年而頗勞然倚爲長城捨一日而不  
可勉卿忠力布朕腹心宜體所懷即斷來表

荅杜佑謝男師損除工部郎中表

卿道贊謨猷功成輔弼師損克承訓義雅有令名豈  
惟賞延兼以能選班行久次頗積功勤郎署稍遷未

爲渥澤省茲章奏深見懇誠所謝知

與嚴礪詔

勅嚴礪省所奏進蒼角鷹六聯具悉卿任重列藩寄兼外閫事皆奉上動必竭誠時屬勁秋致茲鷙鳥調習成性進獻及時取其效用之能足表盡忠之節

與韓弘詔

勅韓弘卿苦心奉國極慮撫人惠彼一方于茲十載歷展勤王之効累陳戀闕之誠才以任彰節因事著不加殊寵何表成功夫外擁旌旄爪牙之任重內參台衮股肱之寄深以爾一心授茲二柄永言倚賴當副誠懷今除卿同中書門下平章事依前宣武軍節度等使餘並如故并賜官告往想宜知悉

荅王鏐陳讓淮南節度使表

卿自領大藩累彰殊効惠安百姓表正一方雖戀闕誠深然殿邦寄切旣執圭而肆覲宜返旆而勞旋況淮海要衝旌旄重任永言共理已有成功方注意於撫綏何瀝誠而陳讓難允來請宜體所懷

荅韓弘讓同平章事表

致理之道審官爲先以卿有文武之才故授卿以將相之任所冀外爲藩翰張爪牙之威內贊謨猷宣股肱之力僉諧允屬衆望攸歸方注意於安危何執謙而陳讓所進官告今却賜卿無或再辭即斷來表

畫大羅天尊讚文

唐元和己丑歲四月十四日畫大羅天尊一軀成奉

為睿聖文武皇帝降誕之辰所造惟歲之春惟月之  
望誕千年一聖之始降百祥萬壽之初電繞樞而夜  
明雷出震而時泰皇帝孝敬寅畏憂勤勞謙以謂無  
疆之休雖肇自於元聖莫大之慶思廣被於羣生爰  
命國工俾陳繪事真相儼若玄風穆如疑從大羅感  
聖而降至誠上通於一德景福旁濟於萬靈休命耿  
光自茲無極詞臣承詔恭為贊曰

大羅天兮高不測浩無倪兮杳無極中有聖兮無上  
尊惟玄德兮可升聞圖相好兮仰高真誠上感兮福  
下臻俾百祥兮與萬壽配聖日兮而長新

荅韓弘再讓平章事表

將相兼委實難其人非其德不可謬承當其才不在

懇讓朕非虛授卿勿固辭宜斷來章即奉成命已具  
前詔當體朕懷

畫元始天尊讚

并序

元者諸天之先始者萬靈之母混而成一強以為名  
至哉無上尊得以是為號正月二十有三日德宗神  
武孝文皇帝在九仙之月遇八音之日也皇帝教弘  
玄訓業奉真宗承文祖之貽謀申孝孫之誠敬以謂  
元始天尊者真儀不遠隨相而生神用無方應念而  
至故命設繪素展儀刑五彩彰施七寶嚴飾所以表  
當宁之瞻仰感在天之聖神通玄應於希夷集靈祐  
於彤嚮詞臣承命跪唱讚云

玄聖何在天上天欲往從之宵無緣命工設色五彩

宣忽如真相見於前聖應聖兮玄又玄薦百福兮坐  
萬年

北齊驃騎大將軍高敖曹讚

并序奉勅撰

高昂字敖曹渤海蓆人也姿體甚異膽力過人累經  
戰伐皆著功績官至驃騎大將軍儀同三司冀州刺  
史其勇敢忠壯冠于一時時稱爲名將後竟以攻戰  
死於王事年四十八贈太尉諡曰忠武贊曰  
敖曹之容好配子羽生揚勲烈死謚忠武武不顧身  
忠不忘主誠哉選士無以貌取

與驃國王雍羗書

勅驃國王雍羗卿性弘毅勇代濟貞良訓撫師徒鎮  
寧邦部欽承王化思奉朝章得睦鄰之善謀秉事大

之明義又令愛子遠赴闕庭萬里納忠一心稟命誠  
信彌著嘉想益深今授卿檢校太常卿并卿男舒難  
陀那及元佐摩訶思那等二人亦各授官告往至宜  
領之此所以表卿勲勤申朕恩禮敬受新命永爲外  
臣勉弘令圖以副遐矚今有少信物具如別錄想宜  
知悉也冬寒卿比平安官吏百姓等並存問之遣書  
指不多及

與季安詔

勅季安劉清潭至省所奏貝州宗城縣百姓劉弘爲  
母病割股充祭事宜具悉卿任重弼諧寄深鎮守勤  
撫綏之政贊燮理之功至使部人忘身展孝雖因心  
有感誠化我之時風而率下可知足表卿之理行省

茲陳奏欽嘆良深

荅杜兼謝上河南少尹知府事表

三川封畿實重其任貳職綱紀亦難其人卿素懷器能累著聲績亞理以明慎選專領以展長才知已下車當親綏撫佇聞報政用副憂勤所謝知

代忠亮荅吐蕃東道節度使論結都離等書

奉勅撰

大唐四鎮北庭行軍涇原等州節度使檢校工部尚書兼御史大夫丹陽郡王朱忠亮致書大藩東道節度使論公都監軍使論公麾下專使辱問悚慰良深國家與吐蕃代爲舅甥日修鄰好雖曰兩國有同一家至於封疆尤貴和叶忽枉來問稍乖素誠雖有過

言敢以衷告來書去頻見燒草何使如然者至如時警邊防歲焚宿草蓋是每年常事何忽今日形言况牛馬因風猶出疆以相及草木延火縱近境而何傷遽懷異端未敢聞命又云去年忽生異見近界築城者且國雖通好軍不徹警近邊修緝彼此尋常况城是漢城地非蕃地豈乖通理何致深疑靜言思之誰生異見頃當報牒彼已息詞今又再言寧無慙德又云皇天無親有德即輔者皇帝君臨萬方迨及四載道光日月德動乾坤南北東西化無不及若非皇天輔德明神福仁北虜何爲歸明南蠻何爲慕化風雨何因大順歲時何因屢豐則神助天親可明驗矣彼若無故生疑無端結怨但思小利不務遠圖則咎孽

之生恐不在此守言取笑却請三思又去漢之臣下  
頻有叛逆者近以吳蜀小寇暫肆猖狂未及討除尋  
以殄滅皇威不露妖沴自清豈假彼蕃遠思傍助忠  
亮謬蒙恩渥叨在藩垣恭守邊隅幸鄰封壤縱未能  
為漢名將亦不可謂秦無人輒獻直言以祛深惑願  
推誠信同保始終各勉令圖以求多福歲暮嚴寒惟  
所履安勝遠垂惠貺愧佩殊深今因押衙迴亦有少  
荅信具如別紙恕輕尠也不具忠亮敬白

與南詔清平官書

勅南詔清平官段諾突李附覽爨何棟尹輔首段谷  
普李昇傍鄭蠻利等段史倚至知異年尋喪逝朕以  
義重君臣情深軫悼卿等哀慕所切當何可仕又知

閣勸繼業撫人輸誠奉教蒸黎咸又封部獲安皆是  
卿等同竭忠謀佐成休績永言及此嘉慰良深勉終  
令圖以嗣遐矚今遣諫議大夫兼御史中丞段平仲  
持節冊命閣勸想當悉之卿等各有所信物具如別  
錄至宜領也春寒卿等各得平安好遣書指不多及

荅王鶚賀賑恤江淮德音表

水旱流行江淮艱食朕明申詔旨親遣使臣蠲其逋  
租賑以公廩爰興利物之利用表憂人之憂庶俾疲  
氓均霑惠澤卿克勤乃職共理為心省茲賀陳深見  
誠意

與茂昭詔

勅茂昭盧校至省所陳奏具悉卿翼戴君親出入將



相久專戎閫累覲王庭忠勞必竭其智謀誠懇每形於章表近者志在憂國慮及安邊請率精兵親防黠虜朕以卿當管軍鎮寄重事殷寶藉撫綏用安封部雖未允所請而深嘉乃誠今又密奏恒州具申事體曲盡忠勤之節備知丹赤之心言念再三發於嗟嘆眷重之至併在予懷想宜知悉

### 與潘孟陽詔

勅孟陽卿夙懷才畧早振聲猷歷踐班行累彰績効自守關輔克舉藩條惠及蒸黎威行軍鎮永言所任未展其能朕以東川蜀門重鎮弊承軍後雄壓險中思得忠勤之臣撫此凋殘之俗量才注意無以易卿今授卿劍南東川節度觀察等使并賜官舌往想宜

知悉

### 荅宰相杜佑等賀德音表

古先聖王託于天上與百姓同其欲與天下共其憂唯推是心可底于道朕臨御萬國迨茲五年惕厲之懷雖勤於夙夜愆伏之候猶害於歲時思革弊以救災在濟人而損已是用欽刑緩死責已卹貧罷郡國之貢珍省宮廐之煩費延春令而布仁行惠先南風而解愠阜財庶憑歡心以召和氣卿等或匪躬獻替或悉力弼諧啓沃之間已申霖雨之用燮理之際佇見陰陽之和各宜勉之以輔予理所賀知

### 荅宗正卿李詞等賀德音表

朕統承鴻緒子育蒼生累歲有秋今春不雨在陰陽

之數雖有盈虛爲父子之心敢忘惻隱俾除人弊以  
盪歲災卿等任重宗卿恩連屬籍省茲陳賀深見忠  
誠

荅將軍方元蕩等賀德音表

朕以時陽舛候春澤愆期思備旱之方無如貶省務  
動天之德莫若精誠是以修已邇人去煩節用與荅  
天戒以致時和卿志竭邦家職修軍衛省茲表章深  
用嘉之所賀知

與迴鶻可汗書

皇帝敬問迴鶻可汗夏熱想比佳適可汗有雄武之  
姿英果之畧統制諸部軍長一方纂承前修繼守舊  
好故得邑落蕃盛士馬精強連挫西戎永藩中夏况

嚮風之義每勤於朝聘事大之敬常見於表章動皆  
由衷言必合禮朕所以深嘉忠欵遐想風規至於寢  
興不忘嘆矚勉弘令德用副誠懷達覽將軍等至省  
表其馬數共六千五百匹據所到印納馬都二萬匹  
都計馬價絹五十萬匹緣近歲以來或有水旱軍國  
之用不免闕供今數內且方圓支二十五萬匹分付  
達覽將軍便令歸國仍遣中使送至界首雖都數未  
得盡足然來使且免稽留貴副所須當悉此意頃者  
所納馬數蓋欲事可久長何者付絹少則彼意不充  
納馬多則此力致歉馬數漸廣則欠價漸多以斯商  
量宜有定約彼此爲便理甚昭然况與可汗禮在往  
來義存終始親鄰旣通於累代恩好益厚於往時所

以萬里推誠期於一言見信遠思明智固體朕心其東都太原置寺此令人勾當事緣功德理合精嚴又有彼國師僧不必更勞人檢校其見撚拓勿施鄔達于等今並放歸所令帝德將軍安慶雲供養師僧請任外宅又令骨都祿將軍充檢校功德使其安立請隨般次放歸本國者並依來奏想宜知悉今賜少物具如別錄內外宰相及判官摩尼師等並各有賜物至宜准數分付內外宰相官吏師僧等並存問之遣書指不多及

與韋丹詔

勅韋丹竇從直至省所陳賀并奏江饒等四州旱損其所欠供軍留州錢米等並已放勉又奏權減俸及修造陂堰并勸課種蒔粟麥等事宜具悉朕頃緣旱慮害農功雖推咎已之心敢望動天之德而未逾涖日膏澤霈然仰荷玄休俯增祗惕卿喜深稱慶忠切分憂旣覽賀陳兼詳奏請至如蠲逋以卹人隱減俸以濟軍須抑末業而移風務茲菽麥防旱年而歉雨修利陂塘皆合其宜並依所奏非卿公勤奉上仁惻發中則共理之心不能至此再三興嘆一二難申勉於始終以副朕意想宜知悉

與從史詔

勅從史史澣至省所陳謝具悉卿亡父早踐班榮久著聲績永言褒贈自叶典常况卿孝友承家勤勞事國念茲忠節皆稟義方將慰匪莪之心宜流自葉之

澤豈爲殊渥頻至謝章

荅宰相杜佑等賀德音表

朕以春候發生歲功資始順陽和而布政賑貧乏而  
勸農載念罪人因除弊事隨其所利施以爲恩富庶  
之端實漸於此卿等義敦宗戚誠竭君親省茲賀陳  
用增嘉嘆

與孫疇詔

勅孫疇劉德惠至省所進隴右地圖兼進戰車陣圖  
車樣及奏陳收復河湟事宜者具悉卿尹茲右輔固  
乃西疆創制戎車繕修軍實思收故地誓立殊勲載  
覽陣圖兼詳所奏誠得開邊之畧益加報國之心斯  
謂盡忠彌增注意眷言所至無忘于懷

與李良僅詔

勅李良僅卿久在軍門習知邊事居常恭恪動必忠  
勤眷乃才良可分憂寄今授卿延州刺史兼安塞軍  
使并賜官告往延州旣兼軍鎮且雜蕃戎防遏撫綏  
兩須得所宜勉所任用副朕懷

荅京兆府二十四縣耆壽謝賑貸表

朕勤求人隱慎卹農功念播植之時必資首種慮懸  
罄之日多乏見糧將便公私宜從歛散卿等名登庶  
老業守先疇各勉農人以副朕意所謝知

白氏文集卷第五十七

在取... 卷三十一

... 卷三十一

... 卷三十一

... 卷三十一

... 卷三十一

... 卷三十一

... 卷三十一

... 卷三十一

